


He Whakatau

Me mātua pānui kia mārāma rawa koe i ngā whārangi 8–14 o tēnei pukapuka.

He whakarāpopoto

Pānuihia te whakarāpopoto ki te ākonga. He whakaatu i te mīharo o tēnei mea te kararehe. Mai te whānautanga o ngā reme māhanga ki te tiroiro haere i tō rāua taiao me te mōhio hoki o te māmā ki te tiaki i ana punua.



He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena, ki te whakauru i ngā ākonga katoa. Me whakatitina rawa te pūkenga tiro whakamua. Matapakihia ngā kupu hou me mahi rawa te kupu taka me ngā whakaahua kei te uhi. Me whakamaumahara hoki te ākonga kia pātai ki a ia anō, i te wā e pānui ana ia mai i te tīmatanga ki te mutunga o te pānui.

He mīharo rawa atu te wā whānau pēpi. Matapakihia te wā whānau mai i te reme ki te ao hou. Ko wai te kaiwhakawhānau i te hipi uwha? Ko wai te kaitiaki i ngā reme? Āta titiro ki ngā whakaahua hei āwhina i a koe. Tauritehia te whakawhānau a te kararehe ki te whakawhānau a te tangata. Tipakohia tētahi o ngā whakaahua hei whakamārama māu te whānautanga mai o te reme.

He Matapaki

Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e mārāma ana mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā mātua, te raupapatanga, ngā kiripuaki;
 - te whakatenatena i te ākonga mō tana tiro ki mua i whakaputa ai ia i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mīhini whitireo, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. He aha te mahi tuatahi a Māmā hipi ka whānau mai ana tana punua?
2. He aha te mahi tuatahi a te reme hou ina whānau kau mai ana ia?
3. E hia te roa o te punua reme ki roto i te puku o Māmā hipi?
4. Me pēhea e mōhio ai a Māmā hipi ki tana ake punua?
5. Ki ōu whakaaro he aha te ritenga o te pēpi hou ki te reme hou?

Ngā whakautu ki ngā whakapuaki māramatanga

1. Ka timata ki te miti, ki te horoi i tana reme.
2. Ka kimi i ngā ū o tana kātua.
3. E rima marama.
4. He maha ngā whakautu rerekē.
5. He maha ngā whakautu rerekē.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te He Tirohanga Whānui mō ngā tino āhuatanga o te pukapuka nei.

Te pūtake

T He tipako i ētahi rerenga whakamārama mai te pukapuka.

He whakatakinga ā-roro, he whakaharatau

Me matapaki te reo whakamārama mō ngā pikitia e hāngai ana. Anei ētahi rerenga hei whakaoti mā te ākonga.

He tīmatanga whakamārama:

- He kōrero tēnei ...
- I mua atu ...
- He nui ...

Me whakahau te ākonga ki te whakamārama i te kaupapa, ā, me whakamahi hoki ētahi pikitia.

Anei ētahi kōrero:

- Ko tēnei pikitia e ...
- Me titiro i te nui o ...

Mā te mahi takirua e taea ai e ngā ākonga te whakaharatau i ngā whakamārama kia hāngai ki ngā pikitia.